

J'étâs toute pétite quand ma mère me fit aller à l'école.

I s'trouvi qué ma voésine qu'avait eune année dé pue que ma, mouri. Comme jé continuais à jouer sous l'hangard you qu' on en avait l'habitude, châque fâs qué son père passait devant et surtout si j'y étâs, ça li faisait du mâ et i s'en allait brêre dans l'célîer. Tout l'monde voéyait bin qu'ça n'allait pâs ! Est pour ella que je fus vite enveyée à l'école.

Malgré mes 4 ans à l'époque, (les classes maternelles n'existent pâs cor), jé m'lévais tous les jous dé bonne heure pour faire mes 3 km à pied. Ça faisait ténan pour mes p'tites pattes mais mon grand frère et ma grande sœur mé portaient dé temps en temps.

10 Dans l'temps là les routes n'étaient point goudronnées et si i pleuvait i y'avait des vés qui sortaient d'la terre et j'en avais tellement pou qué dès qu'j'en vouéyas un jé m'méttas à hucher qué tout l'monde accourait pour vâs c'qui s'passait. Ça n'plaisait pâs à mon frère qu'aimait mieux m'porter qué d'vas arriver tioc un.

15 Quand i faisait bieaü, la route était poussiérouse et on pouait dessiner su la terre. Est comme ça qué les grands savaient si ceux qu'arrivaient des ch'mins d'a côté étaient déjà pôssés. Pasqu'i z'avaient un code, yeux qui possaient les permiers marquaient o lous sabots d'eune croix ou d'aute chose mais quand i z'avaient un signe i l'gardaient. Est comme ça qué les sabots d'ma sœur né duraient rin, i 'taient toujours à l'éras, ol 'tait toujours à marquer à tchôque route youc on arrivait. Les derniers qui pôssaient effaçaient do eune branche. Pourtant mon frère

20 n'tait pâs trop fiêr quand eune certaine souatié était d'avant nous, pasqu'étais des ténieux et des bagarroux. I cherchaient toujours la M...e ! Si n' sé trouvaient pâs l'matin, i s'trouvaient au sa, après l'école et là, i s'donnaient des pilées et sé faisaient point d'cadeaux, les paletôs t'aient souvent déchirés ou les boutons arrachés, étaient les mères qu'étaient contentes !

25 A l'école, ça s'possî bin. J'étâs la pu pétite et tout l'monde vouli m'pouponner. Au début jé m'laissi faire mais bin vite jé n'voulu pu.

J'appris assez vite l'alphabet (mes copines avaient toutes 6 ans) et bin vite les bonnes-sœurs ne fites pu attention à ma différence d'âge et pourtant ! Ol 'taient toutes émerveillées dé m'vâs fini avant d'autes qu'avaient du mâ à sieude. Comme ma sœur lous avait dit qué j' savâs bin

30 broder, (ma mère m'avait appris en sieuvant les vaches dans les clos, était do des broches à chaussettes et d'la laine dé berbîs qué j'fis les permiers pas de tricot), jé fus autorisée à apporter mon travâil et à lou montrer ma « dextérité ». Quand j'avâs fini mes écritures, jé pernâs mes broches et j'en faisâs tiocs rangées, ça amusait les bonnes sœurs pasqué jé tendâs déjà la laine su mon dâ, c'qui n'tait pâs courant cé une gamine dé 4 ans. « Venez voir mes

35 sœurs ! disait la Sœur Maîtreisse « la p'tite s'est mise au tricot ! » O'z'arrivaient et poussaient des gloussements devant la p'tite bonne femme qué j'étâs!

Au retour, si faisait biaü, on pôssait par les vallées brûlées (des landes rocâilleuses qui chéyillaient d'un bôrd su l'ruset d'la Gèsres et d'l'aute bord su la riviêre dé l'Arguénon. La sente

40 n'était pas large et fallait faire attention à n'pâs châs dans la vallée et là pu question dé m'porter pasque mon frère en avait plein les bras : i fallait qu'il emmênait lé pain d'six lives qué maman attendait, quand à ma sœur ol'tait restée garder les vaches à la Cour (grosse ferme qui la nourrissait en échange).

En passant devant la maison des Hourdin y avait eune fontaine qu'on pouvait peusser à la main

45 On en profitait pour empli nos p'tites bouteilles à sirop (on avait emm'ner l'mating la viole pleine dé cide).

C'qui nous faisait bouère avant d'arriver cé nous et nous faisait du bien. Mais quand on disait en arrivant qu'on avait beü dé l'ieaü, maman entrait dans eune colère : « Bande dé p'tits salauds ! » qu'o disait , « valez vous empoésonner do ça , en pu ça donne des guernouilles ! » I

50 faut pâs s'démânder si la p'tite écolière dormait bin la nétéé et c'tait surtout dur dé s'rél'ver le lend'main mating.